

Акафист Пресвятей Богородице ради иконы Ея «Три радости»

Тропарь, глас 4

От святых иконы Твоя радости неизреченная преисполнила еси сердце благочестивых жены. О Пречистая Владычице мира, Всемощная Царица радости, Приснодево твари, егда возвратила оной и мужа, и сына, и достояние ея, такожде и всем нам милосердствуеши, даруй исполнение благих желаний, источая приснотекущий источник радости молящимся Тебе и вседушно вопиющим: Радость всему миру родившая, радости исполни неоскудевающая чтущих Тя.

Кондак 1

Взбранной воеводе не умолчим никогда глаголати мы недостойнии, Всесвятая Дево, рождающая на спасение наше Радость вечную, всякое уныние и печаль отжени от нас да зовем Ти:

Радуйся, Радосте наша, во объятиих Своих Радость всего мира носившая.

Икос 1

Тайну от века открывая Тебе, Пренепорочная Дево, Гавриил безплотных Архистратиг со страхом вопиаше:

Радуйся, Благодатная, Господь с Тобою! Мы же грешнии, нечистыми устами дерзаем вопити Тебе сице: радуйся, Благословенная в женах; радуйся, Богоновесте. Радуйся, виноградная лоза; радуйся, в рождестве и по рождестве Дева. Радуйся, цвете неувядаемый; радуйся, чистоты сокровище. Радуйся, кадило благовонное; радуйся, миро многоценное. Радуйся, одушевленная трапеза; радуйся, света невечерняго жилище. Радуйся, всего мира очищение. Радуйся, Радосте наша, во объятиих Своих Радость всего мира носившая!

Кондак 2

Исполни веселия сердце мое, утоли печаль мою, Пресвятая Дево! Просвети светом нетленной радости мою скорбную душу, да взываю Создателю моему: Аллилуиа.

Икос 2

Разум человеческий не может уразумети, како Ты, неискусобрачная Дево, имела еси во утробе над всеми Бога и родила еси безлетного Сына, темже со страхом взываем Ти:

Радуйся, земле ненасеянная; радуйся, Купино неопалимая. Радуйся, Глубино неудобозримая; радуйся, Мосте к небесем приводящий. Радуйся, Лестнице высокая, юже Иаков виде; радуйся, божественная стамно манны. Радуйся, разрушение клятвы; радуйся, Адамово воззвание. Радуйся, яко с Тобою Господь; радуйся, тьму греховную разрушившая. Радуйся, врата адовы сокрушившая. Радуйся, Радосте наша, во объятиих Своих Радость всего мира носившая.

Кондак 3

Ты, предстательство и покров жизни моей. Ты, надежда и утверждение мое, Всепетая, исцели мою душу, зараженную проказою греховною, да воспою Небесному Жениху во веки: Аллилуиа.

Икос 3

Всевышняго освещенное Божественное селение, радуйся, Тобою бо дадеся радость Богородице зовущим:

Радуйся, высшая небес; радуйся, чистейшая светлостей солнечных. Радуйся, пребывание Творца неба и земли; радуйся, Ангелов радосте. Радуйся, всечудное всех к Богу примирение; радуйся, честнейшая Херувим. Радуйся, славнейшая без сравнения Серафим; радуйся, стено и защито наша от врагов. Радуйся, демонов поражение и ослепление; радуйся, двери райския нам отверзающая. Радуйся, Марие, Госпоже всех нас. Радуйся, Радосте наша, во объятиих Своих Радость всего мира носившая.

Кондак 4

Унынием и многими скорбями исполнено сердце мое. К кому возопию, Владычице, к кому прибегну в горести моей, кому возведу печаль мою, кто плач и вздыхание мое услышит, аще не Ты, Богородице, рождающая на радость неба и земли Царя Христа Бога нашего. Емуже поют с нами Херувимы и Серафимы: Аллилуиа.

Икос 4

Никогда не умолчим и не отступим от Тебе, Владычице, Твоя бо рабы спасаеши присно от всяких лютых бед и скорбей. Темже припадаем к Тебе и с умилением поем:

Радуйся, всех скорбящих Радосте; радуйся, взыскание погибших. Радуйся, утоление наших печалей; радуйся, обидимых Заступнице. Радуйся, алчущих питательнице; радуйся, странных Утешение. Радуйся, обуреваемых Пристанище; радуйся, больных посещение. Радуйся, немощных Покров и Помощнице; радуйся, жезл старости. Радуйся, Мати Бога нашего: Радуйся, Радосте наша, во объятиих Своих Радость всего мира носившая.

Кондак 5

Заступнице мира, возвесели всех прибегающих к Тебе, Матери высшей радости. Покрый нас честным Твоим омофором от всяких бед, напастей, скорбей и болезней, да поем Богу: Аллилуиа.

Икос 5

Моление крепкое, стено неборимая, милости источнице, всех православных прибежище, Богородице Дево! Приими от нас ангельское пение:

Радуйся, Радосте и слава верующих; радуйся, чудо чудес. Радуйся, всех святых непреложное упование; радуйся, скорое в бедах избавление. Радуйся, готовое в нуждах утешение; радуйся, Боговместимое жилище. Радуйся, бездно щедрот и благостыни; радуйся, одушевленный храм. Радуйся, сирот и вдовиц сладостное веселие; радуйся, неистощимое богатство. Радуйся, Невесто Невестная. Радуйся, Радосте наша, во объятиих Своих радость всего мира носившая.

Кондак 6

Во время живота моего не остави мене, Мати Божия. Конец благий получитьи мя сподоби, да взываю Спасителю Богу: Аллилуиа.

Икос 6

Искушения всякаго и страстей избави мя, Всенепорочная! Ущедри, спаси, возвесели мя и от лютых врагов избави и защити, да выну взываю Тебе:

Радуйся, крепкое и непоколебимое упование наше; радуйся, всех Царице и Владычице. Радуйся, всея вселенная великое сокровище; радуйся, всех верных утверждение. Радуйся, Заступнице усердная рода Христианского; радуйся, рождающая всех святых святейшее Слово. Радуйся, небесный престол; радуйся, источнице неистощимый воды живой. Радуйся, ограждение и священное прибежище на Тя надеющихся; радуйся, предстательство христиан непостыдное. Радуйся, Чаше черплющая радость. Радуйся, Радосте наша, во объятиих Своих Радость всего мира носившая.

Кондак 7

В час кончины моея, Всеблагая, предстани мне и убогую мою душу во исходе от окаяннаго тела моего обрадуй, да воспою Победителю смерти и ада: Аллилуиа.

Икос 7

Лица Твоего радостнаго не отврати от мене, Богородительнице! Услыши мольбу мою, и вопль мой к Тебе да придет, Дево Пресвятая! Вонже аще день призову Тя, скоро услыша мя, да взываю Тебе сице:

Радуйся, торжественное пение Ангелов; радуйся, покров и исполнение. Радуйся, Апостолов похвало; радуйся, страдальцев

венчание. Радуйся, столпе девства; радуйся, слез Евиных избавление. Радуйся, постников воздержание; радуйся, живота тленного веселие. Радуйся, монахов умиление; радуйся, святителей удобрение. Радуйся, пресвитеров красото. Радуйся, Радосте наше, во объятиих Своих радость всего мира носившая.

Кондак 8

Со светлой свещею благоволила Пречистая изыти во сретение Жениха душ наших, даруй и мне бодрым сердцем и трезвенною мыслию ночь настоящего жития прейти и в радостный чертог славы Его внити и пети Судии всех Богу: Аллилуиа.

Икос 8

Едина непорочная и чистая Дево, небеснаго веселия улучити со всеми святыми сподоби всех сродников наших, друзей и знаемых, да упокоит их Господь всеильными Твоими молитвами, Пречистая, в месте светле, идеже несть болезни, ни печали, ни воздыхания, но жизнь безконечная. Да простит им Господь всякое согрешение, содеянное ими от юности до смертнаго часа их, да зывают и они с нами:

Радуйся, во успении Своем вас не оставляющая; радуйся, Мати Жизни. Радуйся, избавляющая от смерти души наша; радуйся, в молитвах неусыпающая Богородице. Радуйся, райской радости нас приобщающая; радуйся, Бога плотию рождшая. Радуйся, от рова погибели нас спасающая; радуйся, радостное упокоение всех в вере и надежде скончавшихся. Радуйся, Надеждо ненадежных; радуйся, милосердия двери нам отверзающая. Радуйся, смертоносный грех разрушающая. Радуйся, Радосте наша, во объятиих Своих Радость всего мира носившая.

Кондак 9

О, Богородительнице! Избави нас, грешных раб Твоих, геенны огненной, тьмы несветимой, муки адской и сподоби жизни нестареющей, да поем всегда Сладчайшему Иисусу: Аллилуиа.

Икос 9

Пречистая Дево, Своим ходатайством пред престолом Всевышняго освети мою душу и тело, ум и сердце, всего мя обнови, украси, уцеломудри, прослави, спаси, просвети, и благослови Своим небесным и земным благословением, да зываю Ти:

Радуйся, Невестная Мати и неискусобрачная; радуйся, яко Тобою Сына Божия познахом. Радуйся, нерушимая стено; радуйся, всесовершенное спасение душ наших. Радуйся, Владычице и Мати Избавителя от вечной смерти; радуйся, святых святейшая Ангелов. Радуйся, яко воистину из Тебе Господь воцарися и в лепоту облечеса; радуйся, греховную отъемлющая скверну. Радуйся, утра весеняго светлейшая; радуйся, свирепую буро души моя укрощающая.

Радуйся, молние души озаряющая. Радуйся, Радосте наша, во объятиих Своих Радость всего мира носившая.

Кондак 10

Утверди, Богородице Дево, в православии всех российских людей. Покрый их Твоим честным омофором от всякаго, зла да поют Богу: Аллилуиа.

Икос 10

Боголюбивая Дево Марие, Госпоже Богородице Безневестная, верных спасения и надеждо! Ты бо имеешь многое дерзновение к Небесному Царю, воплотившемуся из Тебе, избави нас от скорбей лютых и печали горькой. Утешения и радости просим у Тебе, Радосте наша, наипаче же вечнаго спасения, умиленно взывая:

Радуйся, Хлеб жизни, Божественнаго Агнца рождающая; радуйся, Лозо виноградная, возрадившая нам плод живота. Радуйся, вином небесных радости нас напоющая; радуйся, святых небесных бессмертных и животворящих страшных Христовых тайн верных сподобляющая. Радуйся, света невечерняго Таиннице неизреченная; радуйся, свете помраченнаго моей души. Радуйся, покрове и надеждо моя; радуйся, прибежище мое. Радуйся, утешение мое; радуйся, радование мое. Радуйся, оживотворяющая меня умерщвленнаго грехами. Радуйся, Радосте наша, во объятиях Своих Радость всего мира носившая.

Кондак 11

Дверь небесную верным отверзающая, покаяния двери отверзи ми, Богородице, да помилует меня Праведнейший Судия, да не объявит моих тайных прегрешений, и не посрамит мене перед Ангелами Своими, да пою Ему во веки: Аллилуиа.

Икос 11

Очисти мя, Пречистая, от всякия скверны плоти и духа, отжени от мене уныние, просвети моя мысли сердечныя, подаждь ми память смертную, сохрани сердце мое от похотей лукавых и услыши мя вопиющаго:

Радуйся, Царице моя Преблагая; радуйся, Заступнице моя преблагословенная. Радуйся, труждающихся Помощнице; радуйся, обидимых Заступнице. Радуйся, отрадо и утешение плачущих; радуйся, утешение в смерти моея. Радуйся, веселие души моея; радуйся, красото Церкви. Радуйся, просвещение ума моего; радуйся, всех христиан утешение. Радуйся, к Богу Молитвеннице и Предстательнице крепкая. Радуйся, Радосте наша во объятиих Своих Радость всего мира носившая.

Кондак 12

Во светлостех святых Твоих како вниду недостойный аз, Боже, Боже мой! Аще бо дерзну совнити в чертог, одежда мя обличает, яко несть брачна! Просвети одеяние души моя, Жизнодавче молитвами Богородицы, да пою: Аллилуиа.

Икос 12

О небесный, о любезный, о сладчайший Твой глас, веселящий сердца наша; с нами бо неложно обещалась еси быти до скончания века, Дево Богородице! По Твоим молитвам слепые видят, глухие слышат, хромы ходят, прокаженные очищаются, алчущие питаются, нагие одеваются, вдовицы утешаются, сироты радуются, нищии веселятся, грешники спасаются, убогие ликуют, воспевая:

Радуйся, одушевленный Божий кивоте; радуйся, Боголюбивая Царице и Владычице. Радуйся, от глада и губительства, труса и потопа нас спасающая; радуйся, от огня, меча, нашествия иноплеменных и междоусобных брани нас защищающая. Радуйся, бурные волны житейского моря укрощающая; радуйся, всякую слезу с очей наших отирающая. Радуйся, яко воистину любовь материнскою нас возлюбившая; радуйся, подательнице Божественных благости. Радуйся, во чреве своем Радость вечную носившая; радуйся, яко тихое пристанище душам нашим готовиши. Радуйся, яко всех родов неумолкаемое веселие. Радуйся, Радосте наша во объятиих Своих Радость всего мира носившая.

Кондак 13

О, Всепетая Мати, Пречистая Госпоже, Дево Богородице! Приими сие малое моление наше, Заступнице крепкая сущих в скорбех и печалех; умоляем Честным и Животворящим Крестом Сына Твоего, Господа нашего Иисуса Христа, подаждь нам дух сокрушенный, сердце смиренное, слезы умиления, многих согрешений наших прощение и радость неувядаемую, да поем в горнем Иерусалиме Спасителю Богу: Аллилуиа.

(Это кондак читается трижды, затем икос 1 и кондак 1)

Молитва

О, Пресвятая Дево, Всеблагаго Сына Мати Всеблагая, царствующаго града и святаго храма сего покрове, всем же сущим во гресех и скорбех верная Предстательнице и Заступнице! Не презри моления нас, недостойных раб Твоих, но умоли Сына Твоего и Бога нашего, да всем нам, с верою и умилением пред чудотворным образом Твоим поклоняющимся, по коегождо потребе радость дарует: грешникам – вседейственное вразумление, покаяние же и спасение; сущим в скорбях и печалех – утешение; в бедах и озлоблениях

пребывающим – совершенное от них избытие; малодушным и ненадежным – надежду и терпение; в радости и изобилии живущим – непрестанное Богу благодарение; сущим в болезни – исцеление и укрепление.

О, Госпоже Пресвятая, умилосердися ко всем чтущим всечестное имя Твое и всем яви всемогущий покров Твой и заступление; от враг видимых и невидимых люди Твоя защиты и сохрани. Супружества в любви и единомыслии утверди; младенцы воспитай, юныя уцеломудри, отверзи им ум к восприятию всякаго полезнаго учения; от домашня свары единокровныя люди миром и любовью огради, и всем нам подаждь друг ко другу любовь, мир и благочестие, и здравие со долгоденствием; да вси на небеси и на земли ведут Тя, яко твердую и непостыдную Предстательницу рода христианскаго и, сие введуще, славят Тя и Тобою Сына Твоего со безначальным Его Отцем и Единосущным Его Духом, ныне и присно и во веки веков. Аминь.